

Dithero tsa Tirelano mo Kutlwanong

07/2016 Thero ka letsatsi la ntlha la ngwaga o mošwa, gongwe la go gopola thupiso ya Morena, e le ka 01. 01. 2016

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang letsatsi le, le kwadilwe mo go Bakol. 3:17, le re: **“Le fa e le eng se lo se dirang ka puo gongwe ka tiro, dirang tsotlhe mo leineng la Morena Jesu, lo ntse lo leboga Rara ka ene.”**

1. Sefela sa 79 - 74/ 77

2. Thapelo: Morena Mong-wa-thata-yotlhe re lebogela bopelotlhomogi jo o dirileng ka jona gore o re sedifatse dinaledi tse di fa pele ga setulo sa Morena. Re a kopa gore lefoko la gago le le boitshepo le re sedimosetse tsela ya go nna ditokololo tsa phuthego ya gago tse di tshelang. Gape re a kopa gore o re thuse gore ditiro tsa rona le go dira ga rona di nne tse di agang phuthego, di se e dige ka go ikgogomosa le go ikgodisa. O re dire gore re se tloge gope mo go wena yo o leng moweine o o tshelang, re se ka ra omisiwe, le e seng go swa. O re utlwe, Morena re ntse re go kopa. Amen.

3. Lefoko la Testamente e kgologolo le kwadilwe mo go Gen. 17:1-8;
Epistolo ka fa thulaganyong ya 4 e kwadilwe mo go Još. 1:1-9;
Efangele ka fa thulaganyong ya 1 e kwadilwe mo go Luka 2:21; le mo go Luka 4:16-21;

4. A go ipolelwe tumelo ya bokeresete!

5. Sefela sa 82 -76/79

6. Thapelo **ya** mmabi wa thero

7. Epistolo ka fa thulaganyong ya 2 e kwadilwe mo go Bagal. 3:26-29, e re: “Gonne lotlhe lo bana ba Modimo ka go dumela mo go Keresete Jesu. Gonne lona lotlhe ba lo kolobeditsweng mo go Keresete, lo apere Keresete. Ga go Mojuta gongwe Mogerika, ga go motlhanka gongwe yo o gololesegileng, ga go monna gongwe mosadi; gonne lotlhe lo tshwana (a le mongwe) fela mo go Keresete Jesu. Mme fa lo le ba ga Keresete, gona lo losika lwa ga Aborahame le barua-boswa ka fa tsholofetsong.” Amen.

8. Thero: Ditsala tsa me mo Moreneng wa rona Jesu Keresete, rotlhe re na le maina le difane tse di supang gore re bomang, le gore re tlhaga kae. Bangwe mo go

rona ba ikgantsha ka tlhago ya bone. Gape ba itsise kwa ba tswang teng go itshupa, fa ba le mongwe tota. Batho ba bangwe ba sosobaganngwa ka ditlhong, fa ba tshwanetse go itshupa gore ke bomang, gonne tlhago ya bone ga e na polelo e ntle ka ga histori ya bone. Le lefoko la thero ya kajeno le bua ka ga kgang ya go ikitse gore o mang.

Go ka batlega ka ntlha ya eng go ikitse gore o mang?

Barategi, mo lefatsheng la rona go na magodu a a tsayang itshupo (ID) ya ba bangwe gore ba reke ka tsona ka thekokhiro. Ka sebaka sa tlhophololo go ne go na le ba le bantsi ba ba fetotseng difane ba itira go balelwa fa ga re ga matukutekele, gongwe makgoa. Bangwe ba leka go tlhamalatsa dithiri tsa bone gore di tshwane le ba merafe e mengwe. Tsotlhe tseo ba di dirile gore e nne baruaboswa ba puso ya tlhophololo e batho ba tlotlilweng ka fa mebaleng ya bone le ka fa tlhagong . Bontsi jo bo neng bo leka tseo bo kgonne go bona manno a a botoka, le meputso e e botoka go feta tsa bagagabo.

Le kwa Galata go ne go le tse o ka reng di ne di tshwana le bao. Moapostolo o kwalela diphuthego tse di kopantseng batho ba ba neng ba forologana. Mo go bone go ne go na le ba ba ikaileng ba ba botoka bogolo go ba bangwe ka ntlha ya tlhago ya bone, bogolo ba losika lwa Bajuda, dikokomane tsa ga Aborahame. Go ikitse ke botlhale, go itse gore o mang, bogolo, fa leina la selefatshe la gago le tla go atisetsa diphatlha tse di botoka mo botshelong.

Mme a re tlhokomeleng **itshupo la nnete**.

Moapostolo Paulo o kaela phuthego ya kwa Galata gore tlhago ya bone le kemo ya bone ya kgololesego le bong jwa bone bo kaiwe se segolo mo botshelong, se re tu mo botshelong jwa tumelo le pholoso, se re: "Ga go Mojuta gongwe Mogerika, ga go motlhanka gongwe yo o gololesegileng, ga go monna gongwe mosadi; gonne lotlhe lo tshwana (lo a le mongwe) fela mo go Keresete Jesu." Mafoko ao a tlhalosa gore Modimo ga o lebe tseo mo kamogelong ya motho gore e nne ngwana le moruaboswa jwa puso ya ona. Paulo a re: motho o amogela itshupo le e leng lotshwao lwa seaparo se a se apesitsweng, e bong Keresete, ka a kolobeditse mo go Keresete. Ke yona kolobetso ya metsi mo leineng la Modimo o o Borarobongwe, e e mmogo le tumelo e e dirang gore Bagalata e nne bana ba Modimo le phuthego ya ga Keresete. Metsi a kolobetso ke tlhapo ya go tsalwa gape, e e phimolang ditshupo tsa bogologolo tsa

bojuda, tsa bogerika, tsa go nna yo o gololesegileng, tsa go nna monna, gongwe mosadi. Mo go Keresete tlhago ele ga e thuse sepe, e re: Tu. Mo lokwalong lo longwe moapostolo Paulo a re: Tse tsotlhe tse di kaiwa botlhale mo bathong le go mo atisetsa diphatlha jaaka botsalo le thutego ya gagwe, o di kaile matlakala gore a bone itshupo ya nnete, "a hume Keresete, a be a fitlhelwe mo go ene, a se na tshiamo ya gagwe e e tswang mo molaong, mme e le e e bonwang ka go dumela mo go Keresete, e bong tshiamo e e tswang mo Modimong ka tumelo."

Bongwefela jwa phuthego

Barategi, re tla ipolela gore keletso ya mongwe le mongwe fa gare ga rona, ba re leng batho gore re kgone mmogo le bana ba rona le ditshika tsa rona. Tse di tlhokegang, tse di batlegang ka mongweyo o se yang mo ditshikeng re di tlhokomele ka go ba latela. Moapostolo o re ruta, rona le Bagalata gore ga go na pharologanyo fa gare ga rona ka fa kemong ya rona fa pele ga Modimo, gonne re kolobeleditswe mo go se le sengwe mo go Keresete, re dirwa bana ba ga Aborahame rotlhe gore rotlhe re nne le kabelo e le nngwe e e tshwanang mo ditsholofetsong tsa gagwe. Ga go na yo o tla amogelang bogolo go yo mongwe, gonne rotlhe re bana le baruaboswa. Go fela mo kolobetsong ka go dumela mo go Keresete gore mongwe le mongwe a dirwe a nne ngwana le moruaboswa. Ga go na letla-anya, gape ga go na Mojuda le Mogerika, le e seng bong jo bo bayang mongwe fa pele ga yo mongwe, gonne ga go na yo o iphang bong. Re a bo fiwa.

Re tla reng, bakaulengwe? Yo o nang le bopelokgale jwa go ikgodisa ke mang? Kana seo se ne sa diragala mo go sebakeng se se fetileng sa kgethololo. Mo phuthegong ya ga Keresete a go se nne ope! Re a lekana, re tshwana ka fa lefokong. Ke go re: Re nna mo bongwengfela ka go itse Modimo, le ka go ikanya Keresete, e le ene yo o re amogetseng mo kolobetsong gore re nne bana ba gagwe. E bile ke ene yo o utlwang thapelo ya rona, fa re mmitsa, re re: "Rara wa rona yo o mo legodimong ..." E bile ke ene yo o re amogealng mo dijong, mo moletlong wa gagwe kwa maleo a itshwarelwang teng. Phuthego e a tlhomama, fa ditokololo di khubama ka mangwele di abelwa mmele le madi mmogo, di gololwa mo thateng ya loso, le mo botlhankeng jwa go ikgogomosa ka tse Paulo a di latlhang, ka e le matlakala.

A Morena a re thuse rotlhe gore re ikaelele go nna mo go tse e leng tsona, re tile kgaogano ya phuthego. Amen.

9. Thapelo: Morena, Modimo, re lebogela go tla ka lefoko la gago la thero ya kajeno. O re thuse gore re ipolele boammaaruri jwa lefoko la gago. A re nneng ditokololo tsa phuthego e re bonang mo go yona botshelo le bakaulengwe. O re dire gore re lemoge bokoa jwa rona, re tle re bone le bopelotlhomogi jwa gago, o bo abele phuthego gore e otliwe ka lefoko le ka selalelo sa gago se se boitshepo. Amen.

Thapelo ya Morena: Rara wa rona yo o mo legodimong ...

10. Sefela sa 78 - 73/76

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke R. P. Ntsimane, ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.